

西安府志卷第二十九

人物志

晉

杜預晉書字元凱杜陵人祖畿父恕預博學多通嘗言德不可以企及立功立言可庶幾也起家拜尚書郎轉參相府事鍾會伐蜀爲鎮西長史及會反以智獲免與賈充等定律令謂之註解泰始中守河南尹預以京師王化之始自近及遠凡所施論務崇大體時虜寇隴右以預爲安西軍司右鑿時爲安西將軍使擊之預陳不可後卒如預策俄拜度支尚書乃奏立藉田又作人排新器興常平倉定穀價較鹽運制科調利國救邊者五十餘條皆納焉在內

西安府志卷二十九

七年損益萬幾朝野稱美號曰杜武庫時帝有滅吳之計惟預羊祜張華與帝意合祜卒拜鎮南大將軍都督荊州諸軍事預以太康元年正月遣叅軍樊顯等循江西上旬口之間尅累城邑皆如預策孫皓平進爵當陽縣侯旣還鎮勤於講武攻破山夷錯置屯營分據要害又修邵信臣遺跡激用澗清諸水浸原田萬餘頃分疆刊石公私同利號曰杜父又開楊口起夏水達巴陵千餘里內瀉長江之險外通零桂之漕預公家之事知無不爲凡所興造必考度始終鮮有敗事徵爲司隸校尉卒諡曰成三輔決錄從兄斌有才望爲黃門郎

傅元晉書字休奕泥陽人祖燮漢漢陽太守父韓魏扶風

太守元少孤貧博學善屬文舉秀才除郎中遷宏農太守所居稱職數上書陳便宜多爲匡正武帝爲晉王以元爲散騎常侍及受禪加駙馬都尉元上疏曰近者魏武好法術天下貴刑名魏文慕通達天下賤守節今陛下聖德龍興受禪臣又奚言惟未舉清遠有禮之臣以敦風節未退虛鄙以懲不恪臣是以猶敢有言詔使元草詔進之秦始四年以爲御史中丞復上便宜五事遷太僕卿時比年不登羌胡擾邊詔公卿會議元陳事切直轉司隸校尉元天性峻急不能容物每有劾奏或值日暮捧白簡整簪帶竦踊不寐坐而待旦於是貴遊斂跡臺閣生風卒諡曰剛子咸字長虞剛簡有大節風格峻整疾惡如仇推賢樂善咸

寧初襲父爵拜太子洗馬出爲冀州刺史遷司徒左長史在位多所執正轉車騎司馬咸以世俗泰侈上疏曰奢侈之費甚於天災欲時之儉當詰其奢又議移縣獄於郡及二社應立從之遷御史中丞會詔舉郡縣補內官咸上書曰興化之要在於官人競內薄外遂成風俗此弊誠宜急革使內外通塞無偏耳咸再爲本郡中正遭繼母憂去官頃之起以議郎長兼司隸校尉時朝廷寬弛豪右恣放咸奏免河南尹澹左將軍倩等京都肅然咸以長吏到官未幾便遷百姓困於無定吏卒疲於迎送時僕射王戎兼吏部咸奏戎不能寧謐風俗請免官吳郡顧榮曰傅長虞直忠果劾按驚人雖非周才偏亮可貴也元康四年卒官

了故論纂敷字穎根清靜有道解屬文元帝引爲從事中
郎亦亦有才思爲上虞令有政績卒於司徒西曹屬

郭奕晉書太原陽曲人武帝初建東宮以奕爲中庶子封
平陵男太原八年卒賜諡曰簡

嚴觀按平陵今興平縣又賈志有興平伯陸玩考晉時
關中無興平縣興平名始平也

司馬詡晉書趙王倫傳倫子封霸城侯尋以逆誅

王承晉書王湛傳太原晉陽人湛子永寧初豫迎大駕賜
爵藍田縣侯子述嗣

嚴觀按晉書王述卒子坦之嗣攷坦之嗣爵在太和三
年時晉已南渡有封號而無境地矣不具載

杜錫晉書杜預傳字世嘏預子少有盛名起家長沙王文
學累遷太子中舍人性亮直忠烈屢諫愍懷太子言詞懇
切太子患之置針著錫常所坐氊中刺之流血他日太子
問錫錫對醉不知後轉衛將軍長史趙王倫篡位爲治書
御史孫秀求交於錫錫拒之秀憚其名高不敢害惠帝反
政遷尚書左丞卒

魏浚晉書東阿人寓居關中有幹用永嘉末與流民東保
河陰之硤石時京邑荒儉浚掠穀麥獻懷帝及洛陽陷屯
於洛北石梁塢撫養遺衆其附賊者解喻之恃遠不從命
者遣將討之遠近感悅劉琨承制假浚河南尹劉曜忌浚
率軍圍之浚夜遁琨所得遂死之贈平西將軍浚

一名亥劉曜攻長安隨浚赴難守金墉城曜引去
餘衆依之元帝承制加冠軍將軍雍州刺史助周訪討平
杜曾詔爲順陽太守王敦反梁州刺史甘卓試以敦旨動
之該距而不應蘇峻反率衆救臺軍峻未平卒
杜乂晉書外戚傳字宏理成恭皇后父鎮南將軍預孫性
純和美容有盛名於江右襲封當陽侯辟公府掾爲丹
陽丞無男生后而乂終妻裴氏娶居養后以禮自防甚有
德音咸康初追贈金紫光祿大夫諡曰穆封裴氏爲高安
鄉君孝武時進廣德縣君裴氏壽考百姓號曰杜姥初司
徒蔡謨甚器重乂嘗言於朝曰恨諸君不見杜乂也其爲
名流所重如此

竇允晉書字雅始平人清尚自修少仕縣稍遷郡主簿舉
孝廉除浩亶長勤於爲政勸課田蠶平均調役百姓賴之
遷謁者拜臨水令克己厲俗遷鉅鹿太守有政績卒於官
王育晉書字伯春京兆人少孤貧爲人牧羊每過小學必
歛歔流涕時暇卽折蒲學書同郡許子章聞而嘉之給衣
食使與子同學遂博通經史太守杜宣命爲主簿司徒王
渾辟爲掾除南武陽令爲政清約宿盜逃奔他郡遷并州
都護

吉挹晉書字祖冲蓮勺人祖朗愍帝時爲御史中丞西朝
不守朗嘆曰吾何忍君臣相隨北面事賊乎乃自殺挹少
有志節孝武帝初苻堅陷梁益桓豁表挹爲魏興太守尋

加輕車將軍領晉昌太守以拒堅功拜員外散騎侍郎苻堅將韋鍾攻魏興拒拒之斬七百餘級加督五郡軍事鍾率衆欲趨襄陽拒邀擊斬五千餘級鍾怒回軍圍之拒又屢挫其銳後賊衆繼至拒力不能抗賊城將陷拒引刀欲自殺友人逼奪其刀會賊執之拒閉口不言不食而死追贈益州刺史

傅宏之宋書字仲度泥陽人父韶晉梁州史宏之少倜儻有大志舉秀才不行義旗建輔國將軍道規以爲參軍盧循作亂桓石綏自號荊州刺史王天恩自號梁州刺史襲西城時韶爲梁州遣宏之討石綏等斬之除太尉行參軍高祖北伐宏之與扶風太守沈田子等七軍自武關入僞

上洛太守脫走進據藍田招懷戎晉晉人龐斌之羌人康橫等各率部歸化進爲桂陽公除略陽太守徐師高叛宏之討平之高祖歸後勃勃僞太子赫連瓚率衆三萬襲長安宏之領步騎五千於池陽破之瓚又抄掠渭南宏之又於寡婦渡破瓚掠七千餘口義真東歸勃勃傾國追躡於青泥大戰宏之軍敗陷沒逼令降不屈見殺時年四十二

宋

吉翰宋書字休文池陽人初爲龍驤將軍道憐參軍爲將佐十餘年清謹剛正永初三年轉道憐大尉司馬出督梁南秦二州諸軍事龍驤將軍梁南秦二州刺史徙益州刺史著美績六年徵還時太祖經略河南以翰爲司州刺史

明年假節監徐兗二州豫州之梁郡諸軍事徐州刺史其
下畏服莫敢犯刑明年卒官

杜驥南史字度世杜陵人曾祖丹避難河西苻堅平涼州
父祖始還關中宋武帝平長安隨從南還驥累遷長沙王
義欣後軍錄事參軍元嘉十七年爲青冀二州刺史在任
八年惠化著於齊土自義熙至於宋末刺史唯羊穆之及
驥爲吏民所稱詠後徵爲左軍將軍兄坦代爲刺史北土
以爲榮坦長子琬爲員外散騎侍郎

杜幼文宋書杜驥傳驥子杜陵人太宗初以軍功爲驍騎
將軍封鄆陽縣男後以發太尉廬江王禕謀反事拜黃門
侍郎出爲梁南秦二州刺史廢帝元徽中爲散騎常侍幼

文所莅貪橫家累千金女伎數十人絲竹晝夜不絕與沈
勃孫超之居止接近常相從又與阮佃夫厚善廢帝不能
平於是率宿衛兵誅幼文等

嚴觀按賈志載始平王劉鸞與平子袁粲攷宋始平等
縣僑治襄陽茲不具錄

梁

韋叡南史字懷文杜陵人世爲三輔著姓伯父祖征宋末
爲光祿勳父祖歸寧遠長史叡事繼母以孝聞齊末爲上
庸太守梁武兵起倍道來赴以爲江夏太守天監二年遷
豫州刺史魏遣衆來伐率州兵擊走之四年侵魏詔叡都
督衆軍攻小岷城中宿城拔遂進討合肥叡案行山川曰

吾聞汾水可以灌平陽卽此是也乃堰肥水堰成水通舟
艦繼至使軍主王懷靜築城於岸守之魏乘勝至城下諸
將請走保三义叡怒令取繳扇麾幢樹之堤下示無動志
魏兵鑿堤叡築壘於堤以自固起鬪艦高與合肥城等四
面臨之城潰俘獲萬餘叡每晝接賓旅夜算軍書撫循其
衆士爭歸之合肥旣平班師叡悉輜重居前身乘小輿殿
後魏人不敢逼全軍而還五年魏中山王元英攻北徐州
帝遣將軍曹景宗拒之次邵陽洲詔叡會焉叡於景宗營
前夜掘長塹樹鹿角截洲爲城北曉而營立元英大驚魏
人先於邵陽洲兩岸爲橋樹柵數百步跨淮通道叡裝大
艦爲水軍會淮水暴長鬪艦競發皆臨賊壘以小船載草

灌之以膏風怒火盛敢死之士拔柵斫橋倏忽之間橋柵
盡壞軍人一當百魏人大潰元英遁走以功進爵爲侯七
年司州刺史馬仙琕自北還軍爲魏人所躡三關擾動詔
叡督軍援焉叡至築城開塹衆譏其示弱叡曰爲將當有
怯時時元英將復邵陽之恥聞叡至乃遁十五年徵拜護
軍普通元年遷侍中車騎將軍未拜卒於家贈車騎將軍
開府儀同三司諡曰嚴叡雅有曠世之度所至有政績將
兵仁愛被服必於儒者雖臨陣常緩服乘輿執竹如意以
麾進止梁世名將莫及也子放字元直位竟陵太守在郡
和理爲吏人所稱大通元年武帝遣領軍曹仲宗等攻渦
陽以放爲明威將軍總兵會之魏大將軍費穆帥衆奄至

放軍營未立放從弟洵驍果有勇力放令洵單騎擊刺屢折魏軍洵馬亦被傷不能進放胄又三貫矢衆失色請放突去放厲聲叱曰今日惟有死耳乃免胄下馬據胡床處分士卒皆殊死戰逐北至渦陽魏遣常山王元昭等來援放大破之還爲太子右衛率中大通二年徙北徐州刺史卒諡宣放性宏厚篤實輕財好施於諸弟尤雍穆每遠行及初還常同一室臥起時人比之三姜

康絢南史字長明藍田人少儼曾祖因爲苻堅太子詹事祖穆爲姚萇河南尹絢伯元隆父元撫相繼爲華山太守絢事齊爲華山太守梁武起兵絢舉郡以應天監元年除竟陵太守累遷太子右衛率甲仗百人直殿內時堰淮

水以灌壽陽假絢節都督淮上諸軍事并護堰作役人及戰士十四年魏遣將楊大眼揚聲決堰絢命諸軍撤營露次以待之遣其子悅挑戰斬魏咸陽王府司馬徐方興魏軍小卻十五年四月堰成絢開湫東注又縱反閒於魏魏人信之鑿山深五丈開湫北注水日夜分流湫猶不減其月魏軍竟潰而歸水之所及夾淮方數百里魏壽陽城戍稍徙頓於八公山尋除司州刺史領安陸太守絢在州大修城隍號爲嚴整普通元年除衛尉卿未拜卒諡曰壯子悅嗣

杜懷寶通志萬年人天監中以軍功歷梁秦二州刺史吉士瞻南史字梁客蓮勺人少有志氣不事生業梁武起

兵義陽太守王撫之天門太守王志遜武陵太守蕭彊等
並不受命鎮軍蕭穎胄遣士瞻討平之歷秦梁二州刺史
加都督又爲西陽武昌二郡太守在郡清約家無私積普
通七年卒謚曰明子琨時在戎役聞問一踊而絕良久乃
蘇不顧軍制輒離所部以孝聞詔下旌異

杜榭南史杜陵人父懷珪少有志節梁天監中累有軍功
後又立功南鄭位梁秦二州刺史大同初魏軍復圍南鄭
懷珪命第三子嶷二百人與魏前鋒戰於光道寺流矢中
其目失馬敵人交稍將至嶷斬其一騎而上馳以歸嶷膂
力過人所佩霜明朱弓四石餘力斑絲纏稍長二丈五同
心敢死士百七十人敵人憚之號爲杜彪卒謚桓侯嶷位

西荊州刺史劉嶷弟也以膽勇稱太清二年歸元帝爲武
州刺史隨王僧辯東討侯景至巴陵景遁加侍中進公爵
追景至石頭景敗榭入據臺城景平加散騎常侍江州刺
史齊將郭元建攻秦州僧辯令榭赴援大破之元建遁王
琳長史陸納等反帝徵榭與王僧辯討之及納等戰於車
輪大敗之納等降又與僧辯西討武陵王於硤口旋鎮邁
疾卒謚武兄嵩岑嶷嶷嶷岸及弟幼安並知名岸字公
衡大清中與榭隨岳陽王督攻荊州同歸元帝帝以爲北
梁州刺史岸請以五百騎襲襄陽督夜遁歸襄陽岸等知
督至遂奔其兄南陽太守獻於廣平督遣將攻拔之嶷獻
岸等斬於襄陽幼安性孝雄勇過人與兄榭同歸元帝爲

西荊州刺史與王僧辯討河東王譽於長沙平之又助紇
文盛東討侯景至貝磯大敗景將任約斬其儀同叱羅子
通湘州刺史趙威方等仍進軍大舉漢口別攻武昌景反
蘆洲上流以壓文盛幼安與衆軍大敗之會景陷郢州文
盛遁歸軍敗幼安降景景殺之龔岑之子也少驍勇善用
兵與諸父歸元帝爲郢州刺史與王僧辯東討河東王譽
又隨僧辯下繼徐文盛軍至巴陵聞侯景西上乃與僧辯
等守巴陵景圍之數旬不尅而遁遷定州刺史及衆軍至
姑孰景將侯子鑿逆戰龔擊敗之子鑿遂至石頭景親會
戰龔與衆軍大破之又與王僧辯降陸納平武陵王及黎
平江陵齊納貞陽侯明以紹梁嗣以龔爲震州刺史吳興

西梁府志卷二十九

十

太守遷散騎常侍鎮南大將軍龔僧辯壻也陳文帝銜之
切齒及僧辯敗龔據吳興以拒之頻敗陳文帝軍部將杜
泰私通於文帝說龔降龔然之其妻王氏曰霸先仇隙如
此何可求和因出私財賞募復大敗文帝軍後杜泰降文
帝文帝遣人負龔出項王寺前斬之王氏因截髮出家杜
氏一門覆矣

韋粲梁書字長倩杜陵人好學仗氣太清二年爲散騎常
侍粲聞侯景作逆簡閱部下得精卒五千馬百疋倍之
援粲就內侍劉孝儀謀之孝儀曰當有別勅豈可安
動時孝儀置酒韋怒以杯抵地曰賊已渡江便通官軍
陸俱斷何暇有報假令無勅豈得自安韋粲今日何如

酒卽馳馬出以輕舸就路至南洲司州刺史柳仲禮亦卽步騎萬餘人至橫江粲卽送糧仗贍給并散私金帛賞其戰士建議推仲禮爲大都督進軍次新亭是夜仲禮入粲營部分衆軍令粲頓青塘粲卽所部水陸俱進時值昏霧軍人失道比及青塘夜已過半壘柵至曉未合景率銳卒來攻遂敗賊乘勝入營粲叱子弟力戰兵死略盡遂見害子尼及三弟助警構從弟昂皆戰死賊傳粲首以示城內太宗聞之流涕曰社稷所寄惟在韋公如何不幸先死行陣詔贈護軍將軍世祖平侯景追諡曰忠貞並贈助警構及尼皆中書郎昂員外散騎常侍粲長子臧字君理歷官東宮領直侯景至帥兵屯西華門城陷奔江州收舊部曲

西梁府志卷二十九

十一

據豫章爲部下所害

韋愛梁書韋叡傳字孝友叡族弟沉靜有器局少而偏孤事母以孝聞篤志好學每虛室獨坐遊心墳素而埃塵滿席寂若無人尤善周易及春秋左氏袁顛爲雍州刺史辟爲主簿遭母憂廬於墓側負土起墳高祖臨雍州聞之親往臨弔服闋引爲中兵參軍義師之起也以愛爲壯武將軍時京邑未定雍州空虛魏興守顏僧都等據郡反愛沉敏有謀素爲州里信服乃推心撫御曉示順逆兼率募鄉里得千餘人與僧都等戰大破之百姓乃安蕭穎胄之死也和帝徵兵襄陽愛從始興王憺赴焉先時巴東太守蕭瓚巴西太守魯休烈舉兵來逼荊州愛以書諭之瓚卽言

請降高祖受禪進號輔國將軍尋除寧蜀太守西上襲劉
季連行至公安道病卒贈衛尉卿子乾向官至鍾離汝陰
二郡太守

韋正梁書韋叡傳字敬直族弟杜陵人起家南康王行參
軍稍遷至中書侍郎出爲襄陽太守初正與北海王僧孺
友善及僧孺爲吏部尚書郎參掌大選賓友故人莫不傾
意正獨澹然及僧孺擯廢之後正復篤素分有踰曩日論
者稱焉歷官至給事中黃門侍郎

吉玃梁書字彥霄蓮勺人幼有孝性年十一遭母憂水漿
不入口父原鄉令天監初爲奸吏所誣逮詣廷尉其父恥
爲吏訊虛自引咎罪當大辟玃乃搥登聞鼓乞代父命廷

尉蔡法度曰爾孺童志不及此必爲人所教若有悔異亦
相聽許玃曰囚雖蒙弱豈不知死可畏憚顧不忍見父極
刑所以內斷胸臆委骨泉壤此非細故奈何受人教耶法
度更誘之曰主上知尊侯無罪行當釋亮今若轉詞幸父
子同濟玃對曰囚父必正刑書故思殞仆冀延父命瞑目
引領以聽大戮玃初見囚獄掾備加桎梏法度矜之命脫
其二械玃弗聽曰玃代父死死罪之囚惟宜增益豈可減
乎法度具以奏聞高祖乃宥其父丹陽尹王志舉克純孝
玃曰父辱子死斯道固然若玃當此舉則是因父買名拒
之而止年十七應辟爲本州主簿出監萬年縣攝官期月
風化大行後鄉人裴儉連名薦玃以爲孝行純至明通易

老勅付太常旌舉玃初因父成悻疾後發而卒

陳

韋載陳書字德基杜陵人沉敏有器局起家梁邵陵王法曹參軍侯景之亂王僧辯東討元帝以載爲假節都督太原高唐新蔡諸軍事率三郡兵自焦湖出柵口與僧辯會於梁山景平除冠軍將軍尋授義興太守高祖誅王僧辯遣周文育輕兵襲載載嬰城自守高祖遣載族弟翽賁書喻載以誅僧辯意并奉梁敬帝勅載解兵載以衆降高祖以其族弟翽監義興郡引載恒置左右與之謀議徐嗣徽任約等引齊軍濟江據石頭城高祖問計於載載曰齊若分兵先據三吳路時事去矣今急於侯景舊壘築城以

通東道轉輸命輕兵絕其糧道則齊將之首旬日可致高祖從其計永定元年除和戎將軍通直散騎常侍二年進太子右衛率天嘉元年以疾去官卒於家翽字子羽少有志操以仁孝著稱高祖爲南徐州刺史召爲征北參軍尋監義興郡遷驍騎將軍領朱衣直閤尋出爲宣城太守天嘉二年預平王琳之功封清源縣侯太建中卒官子宏字德禮有文學歷官至永嘉府諮議參軍

嚴觀按賈志載始平子趙知禮新豐子蔡景攷陳無陝省境土皆僑治他所不具錄

北魏

拓拔黎魏書太祖紀天賜四年二月封皇子黎爲京兆王

本傳神麤元年薨子根襲

于謹周書河南洛陽人初封石城伯後從太祖征潼關破迴樂城進爵藍田縣公邑一千戶

寇讚魏書字奉國上谷人徙萬年父修之東萊太守讚少清潔姿容巖嶷非禮不動除襄邑令姚泓滅秦雍人千餘家推讚爲主歸魏拜河南郡太守其後秦雍人來奔河南滎陽河內者戶至萬數拜讚南雍州刺史於洛陽立雍之郡縣以撫之由是流人襁負自遠而至參倍於前進爵河南公加安南將軍領南蠻校尉仍刺史分洛豫二州之僑郡以益之在州十七年甚收公私之譽卒諡曰宣穆長子元寶豫州別駕子祖徐州刺史子靈孫赭陽太守元寶弟

虎皮有才器本縣令弟臻字仙勝居喪以孝稱除宏農太守子祖訓順陽太守

高允魏書渤海人顯祖不豫以定議勳進爵咸陽公卒子忱襲後例降爲侯

長孫肥魏書代人以功賜爵瑯琊公後降爲藍田侯天賜五年卒諡曰武子翰襲爵

杜元寶魏書文成帝紀興安二年正月辛巳司空杜元寶進爵京兆王歷代紀事年表廣平王遺子以謀反誅

拓拔推魏書文成帝紀太安五年四月封皇帝弟子推爲京兆王本傳子太興襲以贖貨削除官爵

拓拔禧魏書孝文帝紀太和九年三月封皇弟禧爲咸陽

主本傳世宗覽政禧與李伯尚謀反賜死絕其諸子屬籍
拓拔勰魏書孝文帝紀太和九年封食邑二千戶改封彭
城王

拓拔愉魏書孝文帝紀太和二十一年八月壬戌立皇子
愉爲京兆主本傳以貪縱不法謀逆見執而死

獨孤伏陁周書獨孤信傳雲中人以父善勳封魏寧縣公
廢帝元年又以父勳進爵長安郡公

獨孤陁周書獨孤信傳陁以信勳封建忠縣伯邑五百戶
韋閔魏書字友觀杜陵人世爲冠族祖楷晉長樂清河二
郡太守父達慕容垂大長秋閔少有重望世祖徵拜咸陽
太守轉武都太守屬郝溫吳愛反關中擾亂閔盡心撫納

西安府志卷二十九

五

所部獨全子範歷守華山郡閔兄子禎喜馮翊太守子祉
天府少卿祉子義遠岐州刺史祉弟禎有識幹給事黃門
侍郎子文殊員外散騎侍郎閔從叔道福安遠將軍子欣
宗徐州長史帶彭城內史撫綏內外甚得民和轉大中大
夫爵杜縣侯卒諡曰簡子元叡潁川長史欣宗從父弟合
宗東海太守

韋珍魏書韋閔傳閔族弟杜陵人父尚安西府從事珍少
有志操高祖初蠻首桓誕歸欵令珍與誕招慰蠻左自懸
瓠西入三百餘里至桐柏山窮淮源宣揚恩澤招降七萬
餘戶置郡縣而還除左將軍樂陵鎮將賜爵霸城子蕭道
晟民謝天蓋自署司州刺史欲以州內附爲道晟將崔慧

景攻圍詔珍渡推援接珍破慧景擁降民七千餘戶內徙表置城陽剛凌義陽三郡以處之詔珍移鎮北陽蕭頤遣陳顥達率衆來寇珍憑城據戰殺傷甚衆相持旬有二日夜開城門掩擊之賊遂奔潰以功進爵爲侯後車駕征樊郢旣平以珍試守魯陽郡及高祖崩除中散大夫尋加鎮遠將軍大尉諮議參軍永平元年卒諡曰懿子纘字遵彥聰敏明辨爲博士李彪所稱高祖每與名德沙門談論往復纘掌綴錄無所遺漏壽春內附王肅出鎮揚州請纘爲長史帶梁郡太守永平三年卒肅字尊顯少有志業年十八辟州主簿遷秘書郎中稍遷左軍將軍南郢州刺史田夷啟稱肅父珍往任荊州恩洽夷夏乞肅充南道別將領

荊州驍勇共爲腹背詔從之未幾行南荊州事肅宗末除東徐州刺史尋遷東安將軍加散騎常侍蕭衍遣其潁州刺史田麤喜來寇肅於石羊岡斬破之永安三年卒諡曰宣子鴻中書舍人弟道植中兵參軍

韋孝寬周書京兆杜陵人永安中賜爵山北縣男大統五年進爵爲侯移鎮玉壁拒破齊神武進爵建忠郡公北史韋叔裕傳字孝寬少以字行祖直善魏馮翊扶風二郡守父旭雍州大中正永安二年拜南幽州刺史時氏賊數抄竊旭隨機勦撫並卽歸附尋卒官諡文惠孝寬沉敏和正涉獵經史弱冠屬蕭寶夤作亂乃詣闕請爲前趨卽拜統軍隨長孫承業西征每戰有功孝武初周文帝命隨軍及

克澧關下豫州今孝寬行宜陽郡事是歲東魏將段琛復據宜陽其將牛道孝寬訪其手迹偽作書諭歸欵意令謀人送琛營琛得書果疑道恒因出奇兵擒道恒及琛等嶠澠遂清大統八年轉晉州刺史移鎮玉壁十二年齊神武傾衆西入以玉壁衝要攻之神武盡攻擊之術孝寬咸拒破之神武苦戰六旬智力俱困發疾遁去廢帝二年爲雍州刺史恭帝三年還鎮玉壁孝寬善於撫御所遣間諜入齊者皆爲盡力亦有齊人遙通書疏故動靜皆先知天和五年進爵鄖國公後武帝志在平齊孝寬上疏陳三策書奏帝遂大舉再駕而定山東卒如孝寬之策大象九年除行軍元帥徇地淮南以平淮南功別封一子滑國公宣帝

崩隋文帝輔政尉遲迴爲相州總管詔孝寬代之孝寬進至朝歌疑有變乃稱疾徐行詔發關中兵以孝寬爲元帥東伐軍次武陟大破迴子惇軍次於鄴迴自出戰又破之迴窮迫自殺關東悉平薨贈太傅雍州牧諡曰襄孝寬在邊屢抗強敵所有經略布置之初人皆莫解見其成事方乃驚服篤意文史每自披閱末年患眼猶令學者讀而聽之又早亡父母事兄嫂甚謹親族孤遺者必加賑贍朝野稱焉

韋元恢魏書韋閬傳杜陵人有氣幹孝昌初值刺史元法僧外叛元恢招聚同志潛規克復事泄爲法僧所害

崔延伯魏書博陵人正光五年以在揚州建淮橋之功封